

plo longiora convexa, lateribus ad medium sensim latioribus, extus marginata, lineis longitudinalibus duabus elevatis; holosericea sutura alba vittaque medio dilatata & interrupta lactea, margine albo-sericea. Sternum & abdomen albo-sericea. Pedes obscure castacei, pube brevi albida. **BILLE:**

245) **LAMIA (DORCADION) PUBESCENS:** nigro-fusca, corpore artubusque pallido pilosis; thorace rude-punctato submutico, elytris albido nebulosis.

Habitat ad Algier. Mus. Schönherr.

Parva in hac familia, vix magnitudine *Curcul. incani*, & brevior; pilositate tenui erecta totius corporis valde distincta. Antennæ corpore paullo breviores, fusto-rufescentes, tenue pilosæ. Caput nigrum rugoso-punctatum, vertice vix impresso, parce pilosum, palpis ferrugineis. Thorax basi apiceque truncatus, in medio perparum dilatatus, utrinque tuberculo minuto armatus, convexus, rude punctatus, nigro-fuscus. Scutellum minutum triangulare nigrum. Elytra ovalia, ad basin thorace vix latiora, humeris apiceque rotundatis, convexa, evidenter sed irregulariter punctata, fusca, subnitida, pube brevissima cinereo-fusca fallaci obducta, nebulisque obsoletis albidis indeterminatis irrorata. Corpus subtus nigro-fuscum, parce pubescens; pedes breves fusco-picei, pallide pubescentes pilosique, tibiis ad apicem breviter pallido-tomentosis.

DALM.

TRACHYDERES.

246) **TRACHYDERES HIRTICORNIS:** subdepressus niger, thoracis lineis lateralibus, elytrorum fascia femorumque basi rufo-testaceis, thorace 6 spinoso, antennis inferne hirtis.

Habitat in Brasilia. Dom. Kreuger. Mus. Schönherr.

Magnitudo fere *Tr. rufipedis*, sed magis depressus. Caput porrectum rotundatum nigrum, obsolete punctatum, pube tenui helvola adpersum; mandibulæ latæ, compressæ, ferrugineæ, apice nigræ; oculi lunati brunnei. Antennæ corpore duplo longiores, nigrae, articulo primo magno clavato, secundo brevissimo, 3-6 longis cylindricis, exterioribus sensim angustioribus, his omnibus subtus lana longa atra hirtis, reliquis subnudis. Thorax transversus, antice angustior, truncatus, & intra apicem constrictus, basi sinuatus lateribus u-